

L'ETRINCHET

Tayant à plein cûr quand ça li stitche

Enne mastoque du liméro. Pou les relamations, i faut d'aller trouver l'z-imprimeurs; i dineuront à Nivelles dsu les fossés du gazomette.

ATTENTION, LES HOMMES!

Les libéraux éiè les socialisses s' sont mettu inchenne pou ramouner les catholiques, mais il a sté convenu qu'on votera chaque pou leu n'homme et ça pou s' mèsurer et pou wéti qui-ce l' pu fourt.

Les libéraux n'ont nî à balziner, eîè c'esst à costé du no d' Jourez qu'i dvont dner leu coup d' crayon.

I n' s'agit ni d' s'imbroui, i n' faut nwerci qu'in seul trau.

I n' faut ni voter au-dseur éiè co d'aller dner in coup d' crayon tout près du no d' JOUREZ. Fé ça sarou fé in monvai bulletin, perde l'malheureuse vwè qu'on vos a dné.

Dèlez JOUREZ tout seu ça compte pou tous les autes.

D'AINSI :

| 1 | 2 |
|---------------|------------|
| Snoy | Allard |
| Everarts | Jourez |
| Cordier | May |
| Paheau | Gheude |
| SUPPLÉANTS | SUPPLÉANTS |
| de Lalieux | Lefebvre |
| Van Zeebroeck | Boucher |
| Huyberechts | Rousseau |
| Vanham | Becquevort |



Adaionnes-nous

Ça n'a jamais sté no goût d' no vanter d'enn belle djournée devant qu'elle nè seuche outte éié co moins dè carculer dsus no dwegt qu' qu' no povons pierde tout comme qu' qu' no dvons gagni. Nos avons l'habitude de tout prinde à pougnée, les bounes comme les mauvaiches affaires in dsant in nous-même quand l' vint dè l' fourtune souffèlle du mauvais costé : « Bah ! i d'ira mèieux pu tard ».

Les prophètes catholiques n' povont mau d' no rehenn. Maugré qu'i sont si bi strappés qu'in liard qui srou stitchi n' sadju n' pourou mau d' tohère même s'i perdinnet leu djambes à spalès, i criont djà « victoire » sans sondgi què dè l' main dsuqu'à l' bouche i s' pierde souvint branmin dè l' soupe.

Leyonnes-zè crii et rwétonnes devant nous qu' qu' i s' passe pou vir si vramint tout va au ravir din leu camp.

Ci à l' ville, ça passe co no bou catholiques n'ont ni co counneu c' race dè dgins qui ruont du cu din les rangs. Il ont toudi seu mater ceux qui avinnet enn miette pu dè rvinche, il ont toudi seu fé ployi les ciens qui sè rresinnet enn miette pu qu' i n' follou, mais aute part, c'est ni l' même pareie éié enn miette pa tous costés on rinconte des dgins, des boû, des purrs qu' i rrusont carremint de s' leyi in-gueuser.

A Malines, ça n' va pu qu' d'enne fesse, des autes què les vi volent tni in ptit coup l' manche dè l' palette; à Bruxelles, l' fourbouti Helinckx a rrusé tout court dè s' leyi museler; à Namur, maugré les bellès parole d' in monseigneur éié d' in minissè, in juge dè paix est desquindu dè s' ponton pou sè rdauer dsus ses anciens coumarades. A Dinant, on n' vû pu des barons qui n' rêvont què d' fé trainer à leu pid les ptits manants qui ousont rliever l' tiesse. A Louvain, Arlon, Bruges et Roulers, c'est co des boû catholiques qui ont rtroussi leu manches pou tehanner tant qu' i savont dsus leu amisses d' ahier.

Les dgins sont scran des ciens qui no gouvernont éié, au prome din les catholiques, on est desgousté d' vir taper no ptits liards à l' cabaie pou incrachi saquants fainéants; on a tout leu doudou d' vir tous les mêmes, les plats-pids éié les frotteu d' manches rletchi à leu-n-aiche l' assiette au bure adon qu' il a tant d' misères à souladgi.

Pou dire l' vrai, l' mouquet est din les pouie et vo savez què trémèlatche il arrive din n' basse-cou quand n' biesse pareie vi seulemint planer au dseur dè l' cour dè l' cinse.

Qu'est-ce qui din sourтира? Ri d' boû pour ieuss ça iè seur et certain.

Du contraire, dè nos costé, no povons dire què ça marche.

Adon qu' il a saquants années on arou leu peu de moustre s' gezitche à l' intrée dè d' aucun villadge, adon qu' on risquou d' esse assoumé pa des paysans què l' curé avou scolé in no fsant passer pou n' sourte dè dgins d' après l' diale, à l' heure d' aujourd' hui, nos « orateurs », qui vont prêchi l' bonne parole, sont rçu pa tous costés, comme l' sauveur, raccateur du monde. On leu donne pou ieuss

pârlar des salons éié quand i n' d'a pou, on leu-amène in tchar pou fé leu n'harangue d'à l'coupette.

L' paysan flamind, qu'i n'est ni si bieesse qu'il est mau habii, ascoute nos homme éié i s'è rva à s' maiso tout ahieuri in sondgeant què tout c' qu'il a intindu est d'jusse ou bi qu' c'est l' purr vérité éié i n' manque ni de dire à s' chère cœur què l' curé frou branmin méieux d' dire ses patères què d' mèprigi les dgins éié d' les inchauffer iun conte l'aute.

Sans voulwère crier « victoire », on pû carémint dire qu' no gagerons des places éié des vwè éié à les houffées qui vos arrivent de temps in temps din l' nez on sint qu'on esst in train d'apprester l' bouion d'onze heures pou les boû calotins.

L' 22, les hommes, i n' ti qu'à vous qu' cè seuche l' pu bia djou d' vo vie.

Vous autes qu'on spionne dsus tout, qu'on surveite tout pareie què les jésuites surveioint leu coumarades, vous qu'on cache à mette din l' misère s' vos avez l' malheur de fé in faux pas, vo pavez squeur vo spales éié vo desbarasser de l' main qui vo straunera, si vo n' pinsez ni comme l' cien au dbout du bras de qui elle sè trouve.

Votez à costé du no d' Jourez éié d' vo garanti què sara in bia djou pou vous autes si vo ramounez les calotins.

L' lwè dsus l' milice

C'est les libéraux éié les socialisses qui ont fait què l' tiradge au sort éié l' rimplacemint sont pou toudi dsus l'haie.

Adon què tous les libéraux éié tous les socialisses ont voté comme in seul homme l' proposition du général Hellebaut, tout près tous les catholiques, après avwère chaquiné intrè ieuss et s'avwère tout près pris pas les tchveux, ont voté contre.

L' baron Snwè li, arou volu què les rimplacemints dmorent co in temps d' paix éié qu'on marche tertou in temps d' guerre.

Vo viiz ça de d' ci què boû saudart qu'on arou fait avè des dgins qui n'arinnent jamais ieu in fisique din les mains, vu qu' tout l' monde n'est ni affuteu.

Comme l'ennemi arou ieu boû d' tirayt là dins éié què plaisi ç'arou ieu sté pou les officiers de coummander des hommes qui arinnent ieu l' pepette et qui s'arinnent bi seur incoureu au promi coup d' canon.

Pou enn idée qu' no baron a ieu, disez avè mi qu' c'esst enn râlè.

Les libéraux dmandront qu'on rmette dessus fourme l' lwè qu'on vi d' voter.

In garçon pa famie, ça n'est ni d'jusse. Il a bi follu l' prinde pou aboli l' tiradge au sort éié l' rimplacemint. On n'avou ni à chwèsi, vu qu'on avou à fé à des tiestu qui n' volinnent ni avanci pu long.

Mais çu qu'i faut c'est qu'on voie tertou saudart, l' riche comme l' pouve, mais qu'on rabache à in an ou bi à chix mwè l' temps qu'on passera au service. I n'a qu' ça qui est d'jusse éié c'est tout suffisant pou fé in saudart.

C'est c' què les libéraux éié les socialisses front voter s'i dvenont les maisses.

A les commerçants.

Vos avez relamé despu des années pou qu'on rmette dessus fourme l' lwè dsus les patentes qui est vieille d'a pou près cint-z-ans.

Si tout avout sté bi fait, branmin din vous autes arinnent vu leu billet d' taie candgi à leu n'avantage adon: qu'on s'arou rattrappé dsu les grands magasins qu' n' payont tout près ri si on sondge à toutes les dérées qui s' mêlont d' vinde.

Vo billet ou bi vo carten'a ni candgi c' n' année-ci, mais après l' 22 d' mai, si vo n' faites ni voler les pattes in air l' barbaquaine catholique, vo m' d'in direz des nouvelles.

Si vo n' déclarez ni tout d'jusses les bénéfices què vo fsez, les gabeloux rwétront pou vo taxer l' biaté d' vo magasin, les marchandises què vos avez din vo rayons, l' vie què vo mainez, put-ette l' twélette de vo feumme l' tèneue des effants et trinte-chize autès affaires què mes hommes ont si bi l' gamme de descouverti.

Gare à les ciens, ci à l' ville, qui ont ragrandi ou bi fait des nouvelles vitrines. I vont mè l' payi. Si ça tché què vos avez l'idée qu'i vos ont scourci, on vo leie l' crédit d' moustrer vo lives éusquè les commis pourront d'aller fournaqui à leu n' aiche.

Vo viiz de d' ci què bazar què ça va iesse, éié què plaisi què ça sara pou vous autes de fait counnaite les no d' vos clients, les no d' vos fournisseurs éié les pttis trucs qu'il a dins tous les commerces.

Avè l' moncha d' mouchards qu'il a dins toutes les administrations, tout c' què vo faite sara counneu éié sara co in mohi pou les curés qui stitchont leu nez pa tous costés, de vo tni pa l' patte.

C' sara étou in aute mohi de fé rentrer dins les caisses de l'Etat enn digeaine de millions pou continuer à rimpli l' caisse des couvents, pace què bi seur què l' pètit million qu'on a voté l'aute djou a dja levi in goût... in goût d' trop pau, comme on dit.

Allons, commerçants, cabareti, bouchi, boulingi, si ça vo plaît d' vandi vo pourte-monnaie pou incrachi les mwènes et les pttis-frères, votez pou les catholiques, mais après l' z élections, n' faites ni n' sûrte mine quand on véra vos appourter in aute papi qui rtourne tout c' qui est su l' cien qu'on vos a rmis l' sèmaine passée.

Mais comme djé vo connais, vo n' pavez mau d' fé enne affaire pareie. Moins què l' z autes ça n' vo va ni d'iesse rassarci éié c'est ni pou des bruchaudoux què vo d'allez donner vo coup d' crayon.

Vo voterez pa dsous l' limèro 2, ni dins l' traou du mitant, mais à costé du no d' Jourez, qui a toudi seu desfinde comme i faut vo boûrse. D'aller dins l' lisse d'à costé c'est risqui pou vous autes de vo brûler les dwegets et c'est ni vo goût, dj'in sû seur.

A les pttis

Vous qui suez à grossès gouttes enn' année t'au long, qui a tant des ruges pou alever n' famie, qui spéculiez dsus tout pou wèti de mette saquants liards de costé; vous qui a pourté l' fusique durant deux ans, qui arou sté appelé à s' fé trawer l' pia si ç' arou tcheu qu'il arou pris à l'idée d'in mauvais vigin de mette s' pid dsus no contrée.

Vo n'avez pou tout potatche qu'enn vwè à les élections.

Vo gros curé, qui n'a ni l' quertche de nourri n' famie, qui gagne s' vie in tehantant, qui scappe l' sort on n' sait ni co pouqué, qui a tous ses coups boû din l' villadge éié qui n' sondge qu'à bi viqui.

Li, il a twè vwè.

Si vo dsez qu' ça iè d'jusse dvû bi qu'on m' coupe l' tiesse.

A d'bout d' leu roie

Dins tous les pays éusqu'on vote pou des rprésentants, quand c'est qu'il a d'z élections, l' maise du batche, l' cien qui ti l' baston à l' orchesse fait toudi counnaite à les dgins çu qu'i va fait si on li leie co din s' main l' baston pou coummander l'orchesse.

C'est çu qu' M. Briand a fait in France, çu qu'Asquith a fait in Angleterre.

Les électeurs savinent d'ainsi çu qu' les chefs volinnent, çu qu'i d'alinnent interprinde.

Douci, ri, on n' sait ni iuss datte.

Schollaert n'a ri dit, Descamp-David a mettu s' dwegt din s' bouche peu d' mau parler, Renkin s' muche, éié si Helleputte s'a déranger pou d'aller à Wauve, ça sté pou s' vanter d'avwère donné pu d' bure què d' pâgne à les ouvri du tchmin d' fier.

On sint bi què ces dgins là sont arrivés au d'bout du roion, qu'i sont mafflés et qu'in d'in povont pu.

Avè les libéraux ont sait éusqu'o va. On sait què si on les lomme, qu'i vont s' mette tout rade à l' besogne éié qu'i front voter l' suffrage universel à la Chambe, qu'on supprimera ces twè et quatte vwè à l' commune, qu'i donneront des bounès pensions à les ouvri, qui votront l' service personnel in fabachant co l' temps qu'on dmeurra à l' caserne éié qu'il oblidgeont les parints qui n'ont cure de l'instruction d' leu-z-effants, à les mette à scole.

D'in costé ri, c' n'est fut què de rletchi l'assiette au bûre.

D' l'aute costé, in bia programme de toutes affaires djusses qu'on pu adamer sans djoqui.

Qui ce les ciens qui sont co bieesses assez de voter pou des gaiards qui s' présintont avè ri din leu main éié ri din leu poche.

L' place des gaiards pareies esst à l'uche. C'est çu qu' l' électeur s'appresse à leu fait comprinde in votant

a costé du no d' Jourez.

Des francs diâles

Il on l' toupet d' dire din leu gazzette què c' n'année ci, il ont in bènèfice de 195 millions. Maugré ces liards là il ont du mau d' payi leu dgins, éié i pârlont co d' voter 20 millions d'impôts dsus toute sourte sourte de dérées qui vnont des pays étrangers.

N'est-ce ni à tuer à coup d'flotche de barette des diâles qui ousont d'ainsi tromper les dgins.

Il l'ont chési

Les catholiques, qui n' savont pu iuss datte, qui n' savont què costume prinde pou ieuss inberlificoter les bonnasses qu'il ont seu indourmi despu vingt cîq ans, ont lanci in circulaire qu'il ont lommé l' drapeau tricolore.

Pour mi, i wétont d' fé avaler què c' drapeau là est d'a ieuss et què ieuss tout seu savont l' desfinde.

Pou des ciens, à qui il a follu arrachi l' service personnel, c'esst enn franchise qu'on n' raconte qu'à les tigneux.

Mais què volez, i leu follou n' saquet pou muchi leu misères éié il on bi din l'idée què l'électeur n' vira ni tout outte.

C'est pourtant c' qu'i va leu-z-apprinde dimanche qui vi in votant pa dsous l' limèro 2.

Mimile, Cinsi

L'circulaire des catholiques vù fé accwèré que no Mimile, Monsieu Délalieu, esst in cinsi commé i n' d'a wère, in râle même.

Pou dire l' vrai, no Mimile fait cultiver à Felù, pa in trècinsi, des terres qui n' sait ni leuwé.

Il a même fait bâti doula enn grègne comme i n' d'a pou din l' pays et qui fait dmander pa les ciens qui vont pourmener par là « qu' i ce » l' diàle qui a polu indvinter in bâtiment » pareie? »

Cinsi d'ainsi, i d'a des masses. Mais c'est jamais li qui a tnn l'affilet, qui a ieu des cloquettes à ses mains à quertchi fi ou bi à mainer l' tcherue; c'est jamais li qui a sué à tchérii ses despouie; quand ses vatches tauriont ou bi qu' ses cavaies sont tchaudes c'est jamais li qui les a mainés à tour ou présintés au ronçu. La dsus i n' d'in sait ni compte ni londe, eie toutes les ruges qu'il a c'est d'prinde tous les djous l' train d'enn heure pou Felù eie d' raccouri au train d' quatre heures. Eie c'est li qu'on vù fait passer pou in râle cinsi.

Faut-i qu' les catholiques euchoncent des bobiné tout c' qu'il avinrent dsus leu bobine pou wéti d'attraper les dgins in mtant in masse dessus l' visadge de leu grands hommes.

I. STRAPPE

Ohi! qui strappe.

C'est d'ainsi què les cabiniers de l'estation d'Baulé qui rattindinrent desu des mwè après l'augmentation qu'on leu-z-avou promis ont reçu c' semaine-ci lette du minisse comme què i stinne rhaussi.

No Mimile, qui counichou quand ça d'allou leu tchère, a pris s' plume pou les félicité.

S'i pinse què ça va prinde il est bi trompé et i d'in sara pou s' n'enque eyé pou s' papi.

Ces dgins-là ont trainé l' langue desu des années eyé c'est les prinde pou çu qui n' sont ni què d' ewère qu'on va les indourmi avè l'oche qu'on leu tape au moumint qui vont sé rvindgi.

In votant pou les libéraux eie les socialisses i savont bi qu'on n' rattindra ni l' moumint des élections pou ieuss avwère çu qu'il ont dwet.

Hommes du tchmin d' fier, votez pou l' lisse liméro 2, din l' traou tout conte du no d' Jourez. C'est des hommes d'asto qui sont dsus l' lisse là. Dsus l' lisse d'a costé, c'est enn sourte de dgins qui n' sarinent ni gêné de fé l' dentisse s'il avinrent les osti.

A les habitants de l'estation d' l'Est.

Rappelez-vous qu'à les dernières élections communales les dgins d' l'administration vos invoient des circulaires pou vo dire que « très prochainement tout le quartier serait pourvu d'une eau abondante ».

Rappelez-vous étou què ces dgins-là soutennent mordicus què les plans stinrent faits eie que si on n' mettou ni co l' main à l' pauce, toute l' dossée dvou rtchère dessus l' députation permanente qui rtènou les plans qu'on leu-z-avou invoyi.

On leu-z-a mettu desu leu nez din leu minte eie i n'a ni pu d' twè semaines què l' conseie communal invoioi à l' province les plans d'in chateau d'eau à bâti dsus in terrain qu'on a seulement accaté ci au mwè d' février.

On vos a ieu au grenadier in coup d' pu.

Vo n' manquerez ni de d'avwère souvenance quand vo sarez din l' chabotta eie in votant pou Jourez vo donnerez n' leçon courte et boune à c' moncha d' saltimbanques qui n' savont fé qu'enne affaire c'est de s' moqui d' vous autes.

A les habitants des rues Piroux et Castelain

Ey adon, mes dgins, et vo pavée! N' vo l'aton ni dit eie sérine qu' i passerou co bi d' l' eau pa dsous l' pont du moulin Duilière devant què vo n'euchisse vo rue pavée?

On vos a ieu au pweie il a twèz-ans in vos amainant des caiaux qu'on est vnu rquéri quand l'z élections ont ieu sté outte eie on vos a leyi vo berdouie.

Toudi l' vieie histwère, « quand l'efant est baptigi on s' fou du parrain ».

C'est l' moumint d' vo rvindgi eie n' manquiez ni vo coup.

Votez pa dsous l' liméro 2, rí qu'in

face du no d' Jourez.

C'est enn leçon qu' i leu faut pou vous autes avwère çu qu' vo dmandez.

Des liards on d'a toudi pou les couvents

Ça iè counneu qu'on n'a jamais rvindu à l' huche d'in couvent eie qu'on n'a jamais mettu dsus l' rue les bidons d'in mwène. Ces dgins n' fissent qu' montplii eie d'intasser din, leu coffe des gaunettes qui n' sourtont pu jamais, c' n'est fut qu'à les élections.

Maugré què l' misère n' s'abat jamais dsur ieuss, on leu-z-a dné c' n'année-ci n' drigueie d'in million, adon qu'on a refusé d' voter 200 mille francs pou les communes qui ont fait des scoles du 4^e degré, eie qu'on a rimballé MM. Daens et Bnyl qui volinrent rhaussi n' miette les traitements des malheureux « maisses » des ptits villages qui gagnont quédfwè moins qu'in manoeuvre de maçon.

Qui-ce l' cien qui n'est ni scan de vir enn affaire pareie?

Sondjz co bi què, si après l' 22, i sont oo les maisses, i d'ira co pire eie què si on n' met ni les bi, i no maineront tout dwet à n' révolution qui sara pu terrihe que les ciennes qu'on a vu djusqu'à l'heure d'aujourd'hu.

A les ciens qui ont spargni

Les ciens qui ont mettu leu liards à l' course au posse et qui ont sti oblidge de prinde de l' rinte pou ieuss avwère in rindage pu fourt, n'ont qu'à vir l' prix qu' ça leu cousse eie l' prix qu'il arinent à l'heure d'aujourd'hu s'i dvinnent rprinde leu liard.

Il a chix ans, l' rente belge astou à 99,80 %, elle est aujourd'hu à 94,55.

L' cien qui a placé ses liards à l' course il a chix ans, pierd pa mille francs 52 fr. 50.

Si l' rente est d'ainsi ravalée, c'est què l' ministère a toudi dvu de mette dsus l' marché pou payi des travaux inutiles qui sont, put-ète bia, mais qui n' rappouront rí.

C'est d'ainsi qu'on a tapé evoie :

20 millions pou l' Mont des Arts;

6 millions pou in tunnel au palais d'Laeken;

50 millions pou l' port de Zeebrugge; éusqu' i n'a pou d' batia;

1 million pou mette cu dsneur cu dsou in hôtel qui stou bou pou l' prince de Croy, mais ni bia assez pou l' parvenu Renkin;

1/2 million pou rtapper à nieu l' hôtel du minisse Delbeke;

300 mille francs pou l' meubilier de c' pouver homme là;

22 mille francs pou ses cullières, ses fourchettes eie ses coutia;

150 mille francs pou des bidons qu'on lomme « automobiles ».

Enfin, on nè rwète à rí, quand c'est pou qu' mes hommes passionnent leu n' idée d' parvenu.

Et terchedon on n' trouve què dix malheureux billets d' mille francs pou lea dgins qui ont sté ruinés pa les pieuves eie les inondations.

Eie on plaint l' pension à les malheureux qui s' sont raumi à travail toute leu vie.

AVÈ LES CATHOLIQUES

3 mastoques in liard et in dgigot d' pension

AVE LES LIBÉRAUX

In franc d' pension par djou



Qui-ce l' cien qui va rfuser in franc eie qui n' perdra qu' les twès mastoques eie les twès dgigots? Persoune ndo!

I n' faut nwérei qu'in traou : l' cien tout conte l' no Jourez.

ALLONS LES HOMMES

Co in ptit coup d'collé eîè l'baraque des marionnettes catholiques va voter les quattes pattes in air.

Ça va bi pa tous costés eîè les meieusses nouvelles arrivont des villadges éusqu'il, a quatre ans on n'arou ni ouseu mette l'pid sans avwère enn planche à s' dos. Les catholiques sintont bi ieuss même qu'i sont à leu dernières bauies eîè i n' comptont pu qué dsus l'tchaussette pou les sauver.

Eh bi! les hommes, vo n' frez ni marchi avè vo vwè, vo nè l'vindrez ni comme on vind des patates, dè l' viande ou' bi d'autes dérées, vo sondgerez pu long, vo sondgerez à l'bonne pension qui vo rattind din vo vi djou; vo carculerez combi c'est pau d' chouse des blanches ou bi des djaunes pîches que vo frez bi rade passer au bleu, à costé dè çu qu' vo pourrez avwère pu tard et comme des braves, qui n' volent ni iesse din leu vi djou enn quertche pou leu-z-efants, vo voterez pou l' lisse n° 2, pou des dgins qui vo front avwère enn pension dè 365 francs, eîè ça sans rhaussi les contributions, d' vo l'garantis.

Sondgiz bi qué quand vo stez din l'chabotte, i n'a ni in diàle à sav' wère pou qui cè qué vo votez.

Vo n'avez ni à fé dè vo brouyi l'tiesse avè tout c' qué d'aucun calotin dsont pou vo fé peu eîè pou vo fé accwère qué si vo n' votez ni à leu moude, i vo rattraperont au long tour.

Votez sans rnicter dins l' carré à costé du no d' Jourez.

A les Facteurs.

Lè rprésentant Allard avou dmandé au minisse 10.000 francs pou les facteurs qui ont n' besogne de tous les diales durant les quèques semaines devant l'z élections.

I s'agisso de recompenser ces bou serviteurs qui partont au cent diabe long quertchi comme des baudets et qui usont n' paire dè solers à caclindges din leu tournées strazordinaires.

L' Minisse a respondu in mot tout court qu'i n'avou ni in cron dgigot pour ieuss et MM. Snwè et Delalieux ont hosquiné leu tiesse pou dire qu'il avou raiso.

Eîè ces mêmes gaiards onsent vni souteni din leu gazettes qu'il ont 195 millions d' bénéfice din leu caisse.

Si ç'astou l'vérité, c'est n'preuve dè pu qué ces dgins là n'ont ni pu d' cœur qu'in caian, qué quand i s'agit d'ieuss i n'a ri d' trop bou et ri d' trop bia eîè qu' pou payi les ptitès fan-faisies d'in minisse qui nè rwètont ni à in mille franc.

I nè rwètont ni à n' minte

Din leu Drapeau tricolore no bou catho on sont dire qué quand i stou minisse, Van Humbeek a despinsé 450 mille francs pou meubler s' n'hôtele.

S'i pinsont qu'on a roublî çu qu'i s'a passé il a vingt-ciq ans, i sont bi trompé.

Van Humbeek, qué nos avons counneu, n'a jamais dmore au ministère. I n'a jamais abandonné s' maiso dè l' rue Rempart des Moines, à Bruxelles, eîè tous les djous au matin, on povou l' vir s' rinde à s' bureau comme in simpè employé.

Au nûte, on povou l' vir din in cabaret d'alintour dè s' maiso djuer s' pâte à cartes eîè bwère s' pinte dè faro.

Van Humbeek n'a ni comme d'aucun, quitté l' ministère avè l' fafiot, il est mourt pouve. C'est jamais li qui a relamé 18 mille francs pou s' lodgemint comme l' ferluquet Delantsheere, eîè co moins à cachi à intrer à l' Société Générale commè l' bia Devolder eîè l' réussi De Smet de Nayer.

C'astou in brave homme pou qui on tirou volti s' casquetté.

Des pareies à li on pù les cachi din l' parti catholique.

Comme on touîne à drouïe!

MOSSIEU CALOTIN



in 1894
34 vwè.



in 1904
20 vwè.



in 1908
8 vwè.



in 1910
!.....